

Date - 25/07/2025 Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl-Silchawr kawngpui a chhelai hmun thenkhat chu NHIDCL leh sorkar hmalakna in thawm that mek a ni.
2. Chief Minister Pu Lalduhoma chuan contract hna reng reng Chief Minister remtihna lak phawt tur a ni a ti.
2. Prime Minister Narendra Modia leh UK PM Keir Starmer te chu nimin khan an inkawm.
4. Union Minister of Cooperation Amit Shah chaun nimin khan National Cooperative Policy 2025 New Delhi ah a tlangzarh.

<><><>

HIGHWAY

Aizawl-Silchawr kawngpui a chhelai hmun thenkhat thawm that mek a ni a.

Kawngpui siamtha tura na taka nawrtu pawl Joint Civil Society of Mizoram (JCM) Secretary Dr. Vanlalsiama Chhangte chuan Kawnpui leh Sairang inkar kawng chhia chu siam tan a ni tih an hmu tih a sawi a, hemi avang hian Zoram Hnatlang koh an tum pawh an thulh tih a sawi.

Akashvani News in a kawmnaah Dr. Vanlalsiama Chhangte chuan an phut anga kawng thawm that hna chu thawh a nih thu leh Mizoram PWD leh NHIDCL pawhin hna an lo thawk tih an hmu a ti a, Kawng chu la chhe viau mahse hma la tuten theihtawp chhuahin kawng thawm that hna an thawk tih an hmuh thu a sawi a ni.

Kan corr report lo ngaithla zui ang.

Nimina Kawnpui leh Sairang inkar kawngchhia an tlawh hnuah JCM te chuan thuchhuah siamin an thuchhuahah hian kum tin tun ang hun laia kawngpui kal hleihtheih loh a a awm ziah chu Sorkar inthlahdah vang leh remruatna fel awm loh vang nia an ngaih thu an sawi a. Kawngpui pawimawh tak, NH 306 & 06 - Mizoram 'Life Line' chu lirthei tlan theihna atana enkawl reng tur leh a siamthat hna pawh chak taka kalpui zel turin NHIDCL te an phut tlat tih an sawi a ni.

Joint Civil Society of Mizoram (JCM) chuan Mizoram hmun hrang hrang, a bikin NH 44A Darlak leh Tuidam inkar te, Mamit leh Bairabi inkarte, Mizoram chhim lam leh khawchhak lama kawngpui chhe tak takte pawh siamtha chhonzawm zel turin Mizoram Sorkar an ngen tih an sawi bawk a ni.

Nimin vek khan Mizorama lirthei pawl hrang hrang chuan thuchhuah intawm siamin chak lakluhna kawng chhe lutuk chu sawrkar leh NHIDCL in tun thla chhunga tlan nuam tawka siam turin an phut an ti a, kawng siam anih loh chuan an thiam dan anga hmalak an tum tih an sawi a ni.

Nimina Lirthei a eizawng pawl hrang hrang RD Conference Hall Aizawl- a thukhawm chuan National Highway No. 306 (Sairang to Kawnpui), National Highway No. 06 - (Sairang to Buichali), National Highway No. 108 (Sairang to Langkaih), National Highway No 6 (Kolasib to Bairabi) kawng chu lirthei tan zawh hlauhawm khawp a chhia ani an ti a, kawngpui tarlante chu NHIDCL leh Mizoram sorkar in July ni 30 thleng tlan nuam tawka siam an phut tih sawiin July ni 30 thlenga an harsatnate puhru tura kawng hi siam a nih loh chuan an thiam dan anga hmalak ani tawh dawn tih an sawi.

Lirthei neitute sawi danin kawng chhiat avang hian Loan rul theilo tam tak an awm tawh an ti a, NHIDCL leh Mizoram sawrkar an phutna ah Mizoram mipuite thlawp turin an ngen tih an sawi bawk.

Nizan khan NHIDCL Director, Amarendra Kumar, tuna Mizorama cham mek chu Central YMA pisaah lengin Central YMA hruaitute nen NHIDCL enkawl kawngpui chungchang an sawiho a

Director hi NHIDCL Executive Director thar Adelbert Susngi leh OSD to CM Pu Jonathan Lalremruata ten an tawiawm a. Central YMA hruaitute chuan tunhnaia Mizoram chak lakna kawngpui, Kawnpui leh Khamrang inkar kawng chhe lutuk chu a siamthat hna chak taka thawk tura an beisei thu leh hemi chungchangah hian Union Minister of Road Transport & Highways Nitin Gadkari hnenah hma la tura ngenna an thawm thu an sawi a ni.

Inkawmnaah hian Central YMA hruaitute hi an Preseident Pu Lalhmachhuanan a ho a ni.

<><><>

CM-AR

Chief Minister Pu Lalduhoman Assam Rifles chhuahsan ram hman dan ngaihtuah tura din Advisory Committee in Aizawl Civil Hospital zauh nan Aizawl Police Station chu Assam Rifles luah thin ramchhunga dah a thuphungin an pawm a ti.

Aizawl Civil Hospital Trauma Care Facility thar nimina a hawnnaah he thu hi sawiin Chief Minister chuan Aizawl PS awmna chu hospital in an nei thei dawn a nih chuan a lai zawla parking system te awm zawnga duan a nih tur thu a sawi a ni.

Chief Minister chuan Civil Hospital Block A leh B chu sak that tura engkim tihfel a nih tawh thu a sawi a. PMJVK atangin pawisa cheng 88 leh nuai 33 an hmuh thu sawiin block sak that turah casualty a awm avangin a rang lama sawn a tul dawn a ni a ti a. Civil Hospital, Aizawl Block A leh B chu tuna Aizawl PS awmna lamah te pawh dah a tul zawk maitheih thu a sawi a ni.

Nimin khan Assam Rifle ram chhuahsan hman zui dan tur ngaihtuahtu Advisory Committee te chu an Chairman Chief Minister Pu Lalduhoma hovin an thukhawm a.

Meetingah hian Mizoram Synod atanga lehkha hmuh te, AR ram chhunga mimal ram nei court thubuaia lut mek chungchang te, AMC, GPC Mizoram State Assembly, Health, P&E leh PHE Department atanga dilna lo lutte an pharh a.

Kan corr report ngaithla ang.

Aizawl Civil Hospital Complex tihzauh nana Aizawl Police Station awmna hi hman a nih theih nan AR ram chhuahsanah Aizawl Police Station dah ni se tia Health Department dilna chu Advisory Committee ah a thuphunga pawm a ni a, zirchian ni se an ti a.

PHE lamin tui dahkhawlna, hmun thuma siam an dilna pawh, an siam dan tur design te hriatsak hmasak ni se an ti bawk.

Committee hian chhuahlam pangah kawngpui sial thain a hria a. PWD lamin an lo enfiah ang a, mimal leh pawl hmunhma a khawih theihthe zirchian a ni bawk ang.

He hunah hian UD & PA Secy Pu Lalmalsawma Pachuau chuan AR ram chhuahsan hman dan tur Master Plan chu Culture & Nature Centre, khawvel khawpui changkang danga an lo neih thin ang ngaihtuah ran chung a an duan a nih thu a tarlang a. A ram zawng zawng zatve aia tam zaa 52.57 chu hmun hring, mipuite tana len khaw thawn theihna turin an ruahman a ti.

<><><>

CM-CONTRACT

Chief Minister Pu Lalduhoma chuan contract hna reng reng, departmental work emaw, spot quotation emaw restricted tender emaw a awm reng rengin Chief Minister approval lak phawt tur a nih thu leh, la lo an awm leh zeuh thin thu a sawi.

Nimina Aizawl Civil Hospital Trauma Care Facility thar a hawnnaah he thu hi sawiin Chief Minister chuan chutianga Chief Minister pawmpuina, approval lak loh chu a hnuah a hnawh ngei ngei dawn thu leh audit-ah a buai ngei ngei dawn thu a sawi a. Heta a tuartu tur chu official te an ni a ti a, hetih hunah hian Minister te chu an bo tawh dawn a, ziaka engmah a awm tak tak tawh dawn loh avangin official te chu an hnain a tuar lohna tur an ngaihtuah a ngaih thu leh an fimkhur a ngaih thu a sawi a ni.

Tunah chuan ram tana thahnemngai ten ro an rel tawh avangin project te tihhlawhtlin thuai thuai an duh tawh tih Chief Minister chuan a sawi a. Tunah pawh dashboard nen an inchhawp reng tawh thu leh eng department project pawh a hmehchhuah thei nghal vek thu a sawi a. Hetah hian khawtlai an awm leh awm loh te pawisa hman tawh zat bakah a hna thawh tawh chin te a hriat theih vek thu a sawi a. Project tih muan an phal tawh loh thu leh kum 5 chhungin tam tak thawh hman an tum thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM MODI IN UK

Prime Minister Narendra Modia leh UK PM Keir Starmer te chu nimin khan Chequer ah an inkawm. Ram pahnih inkara thawhdunna leh thil pawimawh bakah khawvel thil thleng pawimawh tak takte an sawidun a. Foreign Secretary Vikram Mishria'n chanchinbumite hmaa a sawidanin tun tuma PM Modia zinnaa thil langsar ber chu India-UK Comprehensive Economic and Trade Agreement ziah hi a nih thu a sawi a. He inremna hian ram pahnih tan hlawkna tam tak a thlen dawn tih sawiin chhiah tam tak a ti tlem dawn a ni a ti a. Hruaitu pahnihte hian firfiaka chetna chungchang pawh an sawidun bawk a ni.

Prime Minister Narendra Modia hian nizan khan Maldives a pan lehngal a ni.

<><><>

COOPERATIVE POLICY

Union Minister of Cooperation Amit Shah chaun nimin khan National Cooperative Policy 2025 New Delhi ah a tlangzarh. Thusawiin Pu Shaha chuan Viksit Bharat 2047 tihhlawhtlin nan he policy hi a pawimawh dawn hle a ni a ti a. Cooperation kaltlanga hausakna thlen turin he policy hian a bulthut atangin ruahmanna a siam a ni a ti bawk.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.